

## Het zel joe mor gebeuren!

Bestoan je net vattien doage, kom je aal bie Haarm van der Veen over de kneie. Hai vaalt over de noam 'de Snikkevoarders' en het ook nog aanmarkens op oons consumptieve gedrag in zien stukje 'Cultuurschok' in het Grunniger Dagblad van 14 Jannewoarjie jongstleden. En wie dochten nog wel dat wie 't zo goud doan haren!

Wat de noam aanbelangt, doar hebben wie het natuurlijk laank en braid

over had. Onder andere noamen as Pekelder Zeebonken, Pekel Heerns, Familietrouw (noar dat mooie museumtörfschip in Pekel) en aalderdeegs Pekelder Roegbainers hebben de revue passeert. Zie haren allemaal heur veur en heur tegen. Wie hebben veur 'de Snikkevoarders' kozen om nait allennig de band mit Pekel aan te duden, mor ook mit de haile streëk. Zo voart er bevubbeld ain echte snikke op 't Kenoal in 't kenoal. Mor de snikke van vrouger kwam toch ook overaal. En overaal deden de snikkevoarders toch wel wat op, noar wie aannemen. Vandoar dat wie ook veur shanty-plus- koor kozen hebben, want bie oons op 't reptoir stoan ook laidjes as 'Stadskenoalster Lorelei' en 'Mit mien bootje deur 't Damsterdaip'.

Hest natuurlijk geliek dat snikke's boetengoats nait veul te zuiken haren. Maggen wie den van die en van oons peblik straks vroagen om dat ain beetje braid te zain?

Ja, en dan dat gedou mit alkohol en zo.

Dat is toch ain beetje roar in de kraande komen, snikkevoarders zulf binnen der recht ain beetje van schrokken. Of ze onbekwoam ain 't zingen waren. Mor 't was eerlieks woar allennig mor slim gezellig bie de officiële oprichten. As ik die goud begrepen heb, den suggereerst doe ain beetje dat Scheepsjoagers uut Muntendam misschien wel betere innemers binnen as de Snikkevoarders.

Dat mag zo wezen, mor zingen kinnen ze aans ook wel. Veur twei moand waren zai te gast in de Snikke in Ol-Pekel. Wie hebben van heur genoten. Mor wie lopen hard in!

Haarm, het was oons ain genougen deur die kapitteel te worden, wie vonnen het ain schier en ook nog informatief stukje. Bedankt! Kom rustig ain keer langs te luusteren, den zellen wie aine op dien gezondheid drinken!

**Thom Uffen, secretaris van  
de Snikkevoarders,  
Oude Pekela.**

Gv-Dagblad 4-2-95